

In ora hic maritima multis in locis sabuli cumulos videas, quibus aquam subinde infundunt, donec saluginem contraxerit, quam postea, subditis glebis in candidum salem excoquunt. Nonnullæ sunt hic etiam infidæ arenæ & rapaces (sabalum vivum dicunt) itinerantibus adeo periculosa dum compendia recedente æstu sectantur, ut maxime caveant ne terreno itinere, cum Sidonio loquor, pedestre naufragium faciant; præcipue vero circa *Cocari* ostium, ubi Sirtico quasi agro *Cockersand Abby* Cluniacensium jam pridem monasteriolum, à Ranulpho de *Mesbines* fundatum, sed ventorum violentiæ expositum inter *Cockari* & *Luni*, sive *Loni* ostia interjacet, & mare Hibernicum longe lateque diffusum prospectat.

*Lonus* ille, vulgo *Lune*, ex Westmorlandiæ montibus scatenis, in Austrum ripis impeditioribus, & inæquali alveo delapsus, accolat æstivis mensibus opima Salmonum piscatione ditat, qui cum aqua limpida, & arenosis vadis præcipue lætentur, in hunc & alios hujus oræ fluvios confertim penetrant. Quam primum Lancastrenses inviserit, *Laccus* amniculus ab Ortu aquas illi committit suas. Quo in loco nunc *Over Burrow* est, pertenuis sane rusticorum viculus, quem urbem magnam fuisse, amplosque campos inter *Laccum* & *Lonium* occupasse, & ad extrema deditiois, fame nihil non experta, compulsam nobis memorarunt incolæ, quod à majoribus quasi per manus traditum acceperunt. Et variis certe prisca vetustatis monumentis, insculptis lapidibus, tessellatis pavementis, Romanorum nummis, & nomine hoc novo quod nobis *Burgum* denotat, locus iste antiquitatem suam asserit. Nomen vero antiquum si recuperet aliis, non mihi debeat, etsi ut formicæ semitas anxia sedulitate quæsi, nec est cur quis putet singulorum in Britannia oppidorum nomina sigillatim in Ptolemæo, Antonino, Provinciarum Notitia, & classicis authoribus adnotari. Si tamen conjectura sit locus, BREMETONACVM, (quod aliud fuisse à BREMENTVRACOVERE judicat Hieronymus Surita Hispanus in suis ad Antoninum Notis) ex distantia ratione à COCCIO vel Rible-chester, libens opinarer.

Ab hoc Burgo *Lonus* flu. *Thurland Tunstallorum* propugnaculum, à Thoma *Tunstall* Equite aurato tempore Regis Henrici Quarti extractum, cum Rex licentiam dedisset firmandi & Kernallandi mansum, id est, lorici incingendi, & Hornby egregium castellum prætervehitur, quod N. de Monte Begonis conditorem, Dominosq; suos *Harringtonos* & *Stanleios* Barones de Monte Aquile sive *Mont Eagle* à Th. Stanley primo Derbyæ Comite oriundos venditat. Quorum tertius & postremus Guilielmus Stanley reliquit Elizabetham filiam unicam & hæredem uxorem Edwardi Parker Baronis Morley, matrem Guilielmi Parker, quem Rex Jacobus avito honore Baronis de *Mont-Eagle* denuo exornavit, & nos, nostrique posteris universæ Britannia bono natum agnoscamus. Ex literulis enim subobscuris ad eum clandestino transmissis, & ab eo in medium tempestive prolatis, proditio, quam efferata impietas machinari poterat

Britannia.

longe nefandissima, in ipso fere extremo Reipublicæ fato est deprehensa. Cum scelerati nonnulli sub execranda religionis larva, vi magna pulveris fulminalis conclavi Parlamentario supposita, ad Principem & patriam uno momento distandam jamjam ignem admoturi starent.

*Lonus* hinc paucula permenfus milliaria *Lancaster* ad Australem ripam videt, præcipuum regionis oppidum, quod incolæ verius *Lancaster*, uti & Scoti, qui *Loncastell* vocant à *Lono* flu. LONGOVICVM & nomen superstes, & flumen subterlabens quodammodo argumentantur, ubi sub Britanniarum Duce, ut est in notitia Provinciarum, numerus Longovicariorum, qui à loco nomen sunt mutuati, stationem habuit. Quamvis hodie oppidum sit minus frequens, & incolæ omnes rei rusticæ vacent, (circumvicinus enim ager cultus est, apertus, florens, nec sylvis nudus) in Romanæ tamen vetustatis argumentum Cæsarum nummos nonnunquam inveniunt, maxime ubi fraterculi suum claustrum habuerunt. Aream enim ibi antiquæ urbis fuisse prædicant, quam Scoti cuncta obvia excursionem repentina populati, anno Salutis CCCCXXII, succenderunt. Ex quo tempore ædificare cœperunt propius collem viridantem ad flumen cui imponitur castrum, non magnum quidem, nec vetustum, sed elegans & firmum: adsidetque, ipso colle unicum quod habent templum, ubi Monachi exteri olim suum habuerunt cœnobiolum. Sub quo ad pontem pulcherrimum, quo *Lonus* confertur, in ipsa præcipiti collis declivitate, parietis antiquissimi, & Romani operis pendet fragmentum præceps, *Wery wall* vocitant illi, recentiori Britannico hujus oppidi, ut videtur, nomine. Hoc enim oppidum illi *Caer Werid*, id est, Urbem viridem dixerunt, à viridanti forsitan illo colle, sed hæc viderint alii. Ioannes Moritonii & Lancastriæ Dominus, qui postea Rex Angliæ, Burgensibus suis Lancastria charta confirmavit libertates omnes quas Burgensibus Bristolie concesserat. Edwardusque Tertius, anno regni sui xxxvi, concessit Majori & Ballivis villa Lancastriæ, quod Placita & Sessiones non alibi tenerentur. Polum Arcticum, ut hoc non omittam, grad. L I I I, scrup. v, elevatum aspicit, ab ultimo vero Occidente part. xx, scrup. XLVIIII, removeretur.

Dum ex hoc colle circumspicerem, ut *Loni* ostium viderem, quod non multo inferius effunditur, *Fornes* altera pars hujus regionis ad Occasum oculis occurrit, quam mare quodammodo avulsit. Cum enim litrus hinc se vastius in Occasum projiceret, Oceanus quasi infensor obstinatius illud lancinavit, imo incrudescente æstu litrus devoravit, sinusque tres laxiores efficit, sc. *Kensand*, quo *Ken* fl. emittitur, *Levensand*, & *Duddensand*, inter quos ita prominet terra, ut inde sit nomen sortita. *Fornes* enim, & *Foreland*, idem est nobis, quod Promontorium antierius Latinis. Totam, nisi ad mare, excelsis montium cacuminibus, & crebris rupium molibus assurgit, (*Fornes* sibi indignant) inter quos Britanni diu secure agitare, his defendentis naturæ munimentis freti, licet

Lancaster.

Fournesse.

Fourness Fe.s.

Kkkkkk 2

licet

Salis conficiendi nova ratio.

Quick-sands. Syrticus ager.

Lunc fl.

Salmones.

Over Burrow.

Bremetonacum.

Kernellare quid. Hornby castle. Barones Montis Aquile.

Proditio Pyriopulverea.